

10 JAN 1997

ANGGOTA EXCO PERAK DIBERI TUGAS TERTENTU

IPOH, 10 Jan (Bernama) -- Menteri Besar Tan Sri Ramli Ngah Talib berkata semua anggota exco kerajaan negeri Perak akan diberikan tugas tertentu bagi mempercepat dan meningkatkan pembangunan ekonomi negeri.

Langkah itu selaras dengan tindakan Perdana Menteri Datuk Seri Dr Mahathir Mohamad yang memberi tugas-tugas tertentu kepada semua menteri bagi tujuan yang sama, katanya.

Selain tugas baru, anggota exco juga akan dipastikan dapat menyempurnakan tugas mengikut portfolio sekarang, katanya.

"Saya akan menunggu surat arahan rasmi daripada Perdana Menteri bagi meneliti kehendak beliau sebelum memutuskan tindakan selanjutnya," katanya kepada pemberita di pejabatnya di sini hari ini.

Ramli berkata beliau juga mahu anggota exco menyumbang idea mengenai program yang boleh dilaksanakan sebagai tambahan kepada tugas yang mereka lakukan sekarang.

"Apabila sudah diputuskan bidang tugas baru kelak, terserah kepada anggota exco untuk memutuskan sama ada mereka akan membabitkan pihak lain seperti ahli-ahli majlis pihak berkuasa tempatan untuk sama-sama menjayakan program terbabit," kata beliau.

Perak kini mempunyai lapan anggota exco tetapi belum mengisi dua lagi tempat. -- BERNAMA

LAT MAI